

Noss chantun in mund da paraulas

Cuira: Dis da ditgas e paraulas

DA GION NUTEGN STGIER / ANR

■ **Per trais dis daventa la chapitala grischuna in mund da ditgas e paraulas. En pled, maletg e tun vegnan preschentadas las pli interessantas legendas ed istorgias alpinas. Er en il Grischun avain nus ina ritgezza da quellas ed er bleras da linguatg rumantsch.** Dals 22 fin als 24 da settember stat Cuira en il center da las ditgas e paraulas alpinas. Il program vast cumpiglia in pau per mintgin ed el sa drizza betg mo ad uffants e famiglias, mabain er a creschids. Ultra da quai survegn l'occurrenza er in caracter scientific, i dat lavuratori e lura er turas guidadas. Las Alps n'èn betg mo ina da las regiuns las pli singularas da noss mund, ellas èn segir er in agen spazi cultural cun bleras ditgas, paraulas e mitus.

Figuras plain expressiun

Aposta per ils dis da ditgas e paraulas alpinas ha il sculptur *Peter Leisinger* (Malans) entaglià intginas figuras che van a pèr cun las legendas ed istorgias muntagnardas. Las figuras furman la culissa dals divers lieus en la citad nua che las legendas ed istorgias da las regiuns alpinas vegnan preschen-

tadas. Las sculpturas d'umans ed animals unicas èn exponidas durant in mais en las giassas da Cuira. Ellas èn da caracter fitg fermas, lur expressiun è singulara ed ellas vegnan ad enritgir fitg ils dis da ditgas, paraulas e mitus.

Sustegn da la citad e da la Lia Rumantscha

Alexandra Furler cun ses um *Michael Furler*, ils iniziants principals da l'occurrenza nunusitada, ha ditg che las Alps sajan ina regiun cun ina ritgezza da legendas ed istorgias sco strusch in'otra cuntrada alpina. En il Grischun, en il Tirol dal sid, en Austria ed er en Germania enconusch'ins numerusas ditgas e paraulas ed intginas da quellas vegnan raquintadas quels trais dis a Cuira tar l'emprim festival da ditgas, paraulas e mitus, ha ditg l'inizianta da l'occurrenza. *Alexandra Furler* è da professiun actura e chantadura ed ha uschia ina relaziun pli stretga cun il mund da legendas ed istorgias.

Grazia a la bainvulentscha da numerusas organisaziuns e fundaziuns, da la citad da Cuira, dal chantun ed er da la Banca chantunala saja stà pussaivel da realisar quella occurrenza cun in preventiv da 150 000 francs, ha

menziunà *Alexandra Furler*. Dus buns partenaris per l'organisaziun sajan er stadas la Lia Rumantscha e la Pro Grigioni Italiano. Inchantà da l'entir project è lura er *Patrik Degiacomi*, il cusseglier da la citad e minsiter da cultura da Cuira. La chapitala grischuna saja enconuschenta sco lieu cun ina lunga tradiziun da ditgas e paraulas e gist per quella raschun haja il parlament da la citad decidì da sustegnair l'occurrenza singulara cun 50 000 francs.

Persunalitads sco raquintaders e referents

Per la reschia dals dis da ditgas e paraulas segna l'actur sursilvan *René Schnoz*. El ha ditg ier als meds da massa che l'occurrenza entschaivia il venderdi cun ina saira da gala en il Teater da Cuira. Da la partida vegnan ad esser tranter auter er *Iso Camartin*, *Linnard Bardill*, *Corin Curschellas* ed ils Fränzlis da Tschlin. En acziun tar ils dis da ditgas e paraulas vegnan er anc *Flurin Caviezel*, *Tim Krohn*, *Christine Lauterburg* e *Heike Vigl*, per numnar intgins raquintaders e raquintadras. Singulas occurrenzas èn gratuitas e per las autras èsi da pajar ina entrada modesta.



René Schnoz, l'actur sursilvan, segna per la reschia dals dis da ditgas e paraulas che han lieu en in mais a Cuira.